
PWYLLGOR TRWYDDEDU CANOLOG DYDD LLUN, 6 MAWRTH 2017

Yn bresennol: Y Cynghorwyr, Annwen Daniels, Anwen Davies, Annwen Hughes, John Brynmor Hughes, Louise Hughes, Eryl Jones-Williams, Tudor Owen (Cadeirydd) Angel Russell, Ann Williams, Elfed W. Williams, John Wyn Williams a RH Wyn Williams

Hefyd yn Bresennol: Gareth Jones (Uwch Reolwr Cynllunio ac Amgylchedd), Gwenan Mai Roberts (Rheolwr Trwyddedu), Geraint B Edwards (Cyfreithiwr), Cheryl Morgan (Arsylwi) a Lowri Haf Evans (Swyddog Cefnogi Aelodau)

1. YMDDIHEURIADAU

Derbyniwyd ymddiheuriadau gan y Cynghorwyr Dilwyn Morgan a Peter Read

2. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

3. MATERION BRYD

Dim i'w nodi

4. COFNODION

Llofnododd y Cadeirydd gofnodion cyfarfod o'r pwyllgor a gynhaliwyd ar 12fed o Ragfyr 2016 fel rhai cywir yn ddarostyngedig i nodi fod y Cynghorydd Annwen Hughes yn bresennol.

5. ADOLYGIAD O'R DATGANIAD POLISI HAPCHWARAE

Cyflwynwyd Datganiad Polisi Hapchwarae drafft i'r Aelodau ei ystyried a'i gymeradwyo cyn cynnal ymgynghoriad cyhoeddus yn unol â Deddf Hapchwarae 2005. Amlygwyd prif ddibenion y Ddeddf Hapchwarae ynghyd â gofynion y Comisiwn Hapchwarae i weithredwyr hapchwarae asesu'r risgiau lleol i'r amcanion trwyddedu sydd yn codi yn sgil darparu cyfleusterau hapchwarae ynghyd â chael polisïau, gweithdrefnau a mesurau rheoli i liniaru'r risgiau hynny.

Nodwyd bod y Polisi drafft wedi ei baratoi mewn ymgynghoriad â Grŵp Trwyddedu Gogledd Cymru gyda'r nod o sicrhau cysondeb ledled y rhanbarth. Ategwyd bod Gwynedd wedi cyflwyno'r fformat a bod Cynghorau eraill y Gogledd wedi ei fabwysiadu. Derbyniwyd hyn fel gwybodaeth gadarnhaol.

Adroddwyd y byddai'r cyfnod ymgynghori yn parhau am 12 wythnos gyda'r Awdurdod Trwyddedu yn rhoi sylw i'r ymatebion a dderbynnir. Wedi cwblhau'r broses, bydd y

Datganiad drafft terfynol yn cael ei ail gyflwyno i'r Pwyllgor Trwyddedu, fydd yn argymhell i'r Cyngor Llawn ei fabwysiadu (hyn yn ofynnol o dan Adran 154 o'r Ddeddf Hapchwarae 2005).

Yn ystod y drafodaeth ddilynol, amlygwyd y sylwadau canlynol gan Aelodau unigol:

- Amlygu pryder bod hysbysebion hybu hapchwarae diddiwedd ar y teledu
- Bod cael mynediad at wasanaethau gamblo yn rhy hawdd
- Bod cwmnïau yn annog pobl i brynu tocynnau loteri drwy symleiddio prosesau talu dros y we
- Rhaid ystyried cymunedau bregus – diffyg arian gwario
- Peiriannau hapchwarae mewn tafarndai - angen osgoi gosod y rhain mewn ardaloedd bwyta teuluoedd / allan o gyrraedd plant
- Bod angen i'r Bwrdd Iechyd fod yn rhan o'r ymgynghoriad

Mewn ymateb i sylw ynglŷn â'r pryderon a amlygwyd, nodwyd bod rheolaeth hysbysebion teledu tu allan i reolaeth y Pwyllgor Trwyddedu a'r Awdurdod Trwyddedu ac mai'r Comisiwn Hapchwarae oedd yn gyfrifol am y rheoleiddio.

Awgrymwyd anfon llythyr at y Comisiwn, Aelodau Cynulliad Arfon a Dwyfor Meirionnydd a'r Aelodau Seneddol Lleol i fynegi pryderon y Pwyllgor ar fynediad hawdd i wasanaethau hapchwarae. Amlygwyd bod dyletswydd gofal ar y Pwyllgor i amlygu hyn er mwyn gwarchod unigolion bregus.

Mewn ymateb i gwestiwn ynglŷn â defnyddio swyddogion i wneud archwiliadau ar hap mewn siopau betio nodwyd na fuasai archwiliadau yn cael eu gweithredu oni bai bod asesiad risg wedi ei wneud neu dystiolaeth wedi ei gyflwyno bod pryderon / cwynion am y lleoliad / siop. Cadarnhawyd bod prawf brynu ar eitemau megis tybaco ac alcohol ond nid ar eitemau betio. Amlygwyd mai'r rheswm dros hyn oedd oherwydd nad yw'n ofyn statudol, ond petai'r Pwyllgor yn penderfynu bod hyn yn fuddiol, ni ragwelwyd rhesymau dros beidio.

Mewn ymateb i sylw ynglŷn ag amseriad cyflwyno datganiad drafft i Bwyllgor cyn yr etholiad a bod aelodaeth y Pwyllgor yn debygol o newid erbyn cyfnod derbyn y datganiad terfynol, nodwyd bod pob Awdurdod ar draws y Gogledd wedi cytuno cyflwyno'r datganiad o fewn yr un cyfnod.

PENDERFYNWYD yn unfryfol, cymeradwyo y Datganiad Polisi Hapchwarae drafft yn unol a Deddf Hapchwarae 2005 ar gyfer ymgynghoriad cyhoeddus a cynigiwyd y sylwadau isod:

- yr Awdurdod Trwyddedu i ddrafftio llythyr yn enw'r Cadeirydd a'i anfon at y Comisiwn Hapchwarae i fynegi pryderon y Pwyllgor ar y
 - gordefnydd o hysbysebion betio,
 - bod cwmnïau yn annog pobl i fetio a
 - bod mynediad at wasanaethau hapchwarae yn rhy hawdd.Copi o'r llythyr i'w anfon at Aelodau Cynulliad (Arfon a Dwyfor Meirionnydd) ar Aelodau Seneddol Lleol; i'r Aelodau sydd yn cynrychioli Cyngor Gwynedd ar y Panel Heddlu a Throsedd Gogledd Cymru ac at Brif Swyddogion Trwyddedu Awdurdodau Gogledd Cymru
- yr Awdurdod Trwyddedu i drafod gydag Adran Gyfathrebu Cyngor Gwynedd y dulliau gorau o dynnu sylw at yr ymgynghoriad cyhoeddus - annog defnyddio cyfryngau cymdeithasol

Dechreuodd y cyfarfod am 10.00 y.b. a daeth i ben am 10.50 y.b.

CADEIRYDD